


## Discuors cuagl assassin

GR 05-01-1971



Dacuort ei cumpariu tier la casa editura Desertina in niev cudisch. Quella nova ovra da Ludovic Hendry cumpara sco quart tom ella retscha da cudischs da tastga ni gaglioffa. «Discuors cuagl assassin» ei negin roman criminal, sco ins pudess forsa tertgar. Ei setracta buca ton d'ina ovra creativa, mobein d'ina ovra informativa e didactica. Quei cudisch tracta ils problems dils perschuniers, da lur dimora en perschun e da lur resocialisaziun.

Igl autur ei buca mo secuntentaus cun far studis sur numnai problems, el ha visitau differentas perschuns per tut la Svizra entuorn ed ha sez priu dimora per entgin temps en ina cella. Sin fundament da quels studis e da quellas experientschas ha Ludovic Hendry scret siu niev cudisch. Ei setracta denton buca d'ina reportascha cronologica, il cudisch secumpona da discuors cun 'malfatschents', dad intervistas cun directurs e survigiladers, mo era da cass criminals, raquintai en fuorma auctoriala ni persunala. Il 'fil tgietschen', sch'ins vul tschintschar cheu d'in tal, fuorma igl autur.

Il lectur vegn cunfrontaus cun ina entira retscha da cass criminals da different gener. Buca senza raschun san ins renfatschar agl autur ch'el vessi duui tractar pli paucs cass e persuerter perscrutar quels pli da rudien ed aschia era porscher ina motivaziun psicologica pli fundada. Ludovic Hendry ha denton buca vuliu quei - ei fuss vegniu tut in auter cudisch - el ei il bia secuntentaus culla posiziun digl aspectatur - quella dils biars lecturs - che vesa ils cass criminals exteriuramein e che sa buca penetrar egl intern d'in delinquent. Cunquei ch'igl autur ha vuliu mussar la situaziun hodierna dalla expiazium da castitgs, ei quella metoda segir giustificada. Perquei ch'igl autur ha cumpilau las experientschas fatgas en differentas perschuns, ei sia informaziun forsa tscheu e leu magari contrattictoria. Dad ina vart seprenta la veglia idea ch'ins sappi menar in delinquent anavos ella societad mo tras disciplina e direzia, da l'autra vesa ins ils sforzs per far remedura alla ragisch e buca um da cumbatter simtoms. Tras quella tensiun denter differentas metodos sa il lectur sentir ch'ins ei oz sin via viers ina metoda penitenziara pli humana e pli positiva, ins sa denton aunc buca nua ins ei arrivaus. Plaun a plaun sto il sentiment da vendetga che regia aunc en grondas parts dalla societad viers ils perschuniers untgir alla bunaveglia che vul veramein menar anavos ils 'disviai' e buca mo sesegirar avon els.

Cheu schai la gronda valeta dil cudisch «Discuors cuagl assassin». Ludovic Hendry ha ughegiu da taccar in problem spinal - ussa zuar ualti en discussiun - e da presentar quei al lectur romontsch. Igl ei necessari che era nosa glied arrivadi ad ina posiziun pli positiva enviers l'expiazium da castitgs. Quei cudisch che presenta senza exageraziun varts umbrivaunas dalla veta sa survir fetg bein ad ina discussiun aviarta, tonpli che Hendry tendescha ad ina migliur digl uorden penitenziar.

Il maletg da Karl Somogy dat a quei bufatg cudisch da bunamein 150 paginas ina stupenta cumparsa. In glossari, tgiraus digl autur e da professor Isidor Winzap, fuorma in bien agid pil lectur. Il tema tractau sforza bunamein igl autur da duvra tscheu e leu expressiuns ch'ei buca dil pli currentas. In lectur interessau sa pia profitar dublamein.

«Discuors cuagl assassin» ei quei che pertucca fuorma (jeu vi cheu buca entrar en detagls) e surtut quei che pertucca il tema in novum ella litteratura romontscha. Sco auters ha era quei cudisch sias munconzas, ins sa denton senz'auter cussegliar el al lectur.

ps